

Erindisbréf

Menningar- og nýsköpunarnefndar Fjarðabyggðar

Umboð

1. gr.

Menningar- og nýsköpunarnefnd Fjarðabyggðar starfar í umboði bæjarstjórnar með þeim hætti sem nánar er kveðið á um í erindisbréfi þessu, samþykkt um stjórn Fjarðabyggðar og fundarsköp bæjarstjórnar og eftir því sem lög mæla fyrir um.

Verksvið

2. gr.

Menningar- og nýsköpunarnefnd mótar stefnu í menningar-, nýsköpunar- og ferðamálum. Hún tekur ákvarðanir innan markaðrar stefnu og fjárheimilda í þeim málaflokkum. Nefndin gerir tillögur til bæjarráðs varðandi valdsvið sitt. Nefndin ber ábyrgð á samskiptum við hagsmunaaðila á sviði nýsköpunar og ferðamála í Fjarðabyggð og samskiptum við þá aðila sem vinna að menningarmálum. Nefndinni ber að styrkja stöðu Fjarðabyggðar sem áfangastaðar ferðalanga og vinna að undirbúningi viðburða og hátíða í samvinnu við hagsmunaaðila. Jafnframt hefur nefndin eftirlit með að samþykktum og stefnumörkun á verksviði nefndarinnar sé fylgt. Þá fer nefndin með önnur þau verkefni sem bæjarráð ákveður.

Verkefni

3. gr.

Menningar- og nýsköpunarnefnd fer með eftirtalin verkefni:

Menningarmál

- Stefnumörkun í menningarmálum.
- Stjórn menningarstofu Fjarðabyggðar.
- Ábyrgð á söguritun og aðgerðum bæjarins til að varðveita menningararf sveitarfélagsins.
- Auglýsingar og úthlutun styrkja til menningarmála.
- Samstarf við aðila sem vinna að menningarmálum í landshlutanum, s.s. Austurbrú og menningarmiðstöðvar á Austurlandi sérstaklega Tónlistarmiðstöð Austurlands á Eskifirði. Jafnframt að leita samstarfs við aðra aðila innanlands og utan um aðgerðir til að efla menningarstarf í sveitarfélaginu.
- Ábyrgð á samræmingu og samningum við forsvarsmenn skipulagðra viðburða og bæjarhátíða, hátíðarhalda auk annarra skipulagðra viðburða.

Nýsköpun í ferðaþjónusta og menningu

- Stefnumörkun í ferðaþjónustu.
- Samstarf við þróunar- og nýsköpunarstofnanir í ferðamálum á Austurlandi og á landsvísu.
- Ábyrgð á samskiptum við hagsmunaaðila í ferðaþjónustu og nýsköpun sem því tengist. Jafnframt ber nefndin ábyrgð á samstarfi við samtök ferðaþjónustu í landshlutanum.
- Rekstur upplýsingamiðstöðva fyrir ferðamenn.

Í umboði menningar- og nýsköpunarnefndar fer safnanefnd með ábyrgð á eftirfarandi verkefnum:

- Stefnumörkun í safnastarfsemi Fjarðabyggðar.
- Stjórn Safnastofnunar Fjarðabyggðar og umsjón með rekstri safna Fjarðabyggðar, þ.m.t. samningum um þjónustu safnanna.
- Ábyrgð á samstarfssamningum við söfn með sjálfstæðar stjórnir.
- Málefni almennings- og skólabókasafna sbr. lög 150/2012, málefni minjasafna sbr. safnalög 141/2011 og málefni skjalasafna sbr. lög um opinber skjalasöfn nr. 77/2014.

Laga- og reglurammi

4. gr.

Menningar- og nýsköpunarefnd skal í störfum sínum fylgja almennum samþykktum bæjarstjórnar um málefni sveitarfélagsins s.s.

Stefnumótun bæjarstjórnar þ.m.t. menningarstefnu.

Mannauðsstefnu.

Jafnréttisstefnu.

Innkaupareglum.

Ferli og framsetningu fjárhagsáætlunar.

Skipan

5. gr.

Nefndin er skipuð fimm fulltrúum kjörnum af bæjarstjórn og jafnmörgum til vara.

Bæjarstjórn kýs formann nefndarinnar og varaformann. Nefndin skiptir að öðru leyti með sér verkum. Kjörtímabil nefndarinnar er hið sama og bæjarstjórnar.

Nefndin skal skilgreina þá hagsmunaaðila sem hafa ber samráð við um þróun menningarlífs í Fjarðabyggð.

Nefndin getur í sérstökum tilfellum skipað starfs- eða vinnuhópa til að fjalla um afmarkaða málaflokka. Slíkum nefndum og hópum skal setja erindisbréf þar sem skilgreind eru helstu verkefni og starfinu sett tímamörk innan marka kjörtímabils nefndarinnar. Í erindisbréfi skal m.a. koma fram hvort leggja skuli reglulegar fundargerðir/skýrslur fyrir nefndina og/eða skila niðurstöðu eða ályktun við lok starfstíma.

Verkstjórn og verkaskipting

6. gr.

Formaður nefndarinnar er í forsvari fyrir hana um stefnumótun og ákvarðanir, eftir því sem við á, og hefur ásamt öðrum fulltrúum í nefndinni eftirlit með framkvæmd mótaðrar stefnu í málaflokknum.

Bæjarritari ber ábyrgð á framkvæmd ákvarðana nefndarinnar og rekstri á verksviði nefndarinnar, þ.m.t. að fjármál og starfsmannamál séu innan heimilda og í samræmi við stefnu bæjaryfirvalda.

Boðun funda og fundarsköp

7. gr.

Nefndin heldur að jafnaði tvo fundi í mánuði. Formaður getur boðað til aukafunda eftir þörfum. Komi fram ósk tveggja nefndarmanna um fund í nefndinni ber að verða við því. Fella má niður fundi í júlí og ágúst eða í alls tvo mánuði að sumarlagi.

Formaður boðar til funda, undirbýr og ákveður dagskrá í samráði við bæjarritara og forstöðumann stjórnssýslu og stýrir fundum nefndarinnar. Á dagskrá skulu m.a. tekin mál, sem fulltrúar í nefndinni hafa óskað eftir að tekin verði þar fyrir, enda séu þau á verksviði nefndarinnar. Fundir skulu boðaðir með a.m.k. tveggja sólarhringa fyrirvara, og skal dagskrá og fundargögn fylgja fundarboði. Að jafnaði skulu fundir boðaðir rafrænt.

Um fundarsköp fer eftir samþykkt um stjórn Fjarðabyggðar og fundarsköp bæjarstjórnar eftir því sem við á.

Bæjarritari, eða staðgengill hans, skal sitja fundi nefndarinnar með málfrelsi og tillögurétt. Þá getur nefndin boðað til fundar einstaka starfsmenn Fjarðabyggðar sem og aðra þá sem hún telur þörf á hverju sinni.

Fundaskipulag og ritun fundargerða

8. gr.

Nefndarfundur skal að jafnaði haldinn fyrir luktum dyrum og er óheimilt að greina opinberlega frá ummælum sem fram koma hjá einstökum fundarmönnum.

Fundargerðir skulu skráðar og afrit sent til bæjarráðs að fundi loknum. Um ritun fundargerða fer eftir fyrirætlum samþykktar um stjórn Fjarðabyggðar og fundarsköp bæjarstjórnar og nánari verklagsreglum eftir því sem við á. Fundarritun er á ábyrgð bæjarritara eða staðgengils hans.

Í upphafi árs skal kynna fundaáætlun nefndarinnar fyrir komandi ár. Þar komi m.a. fram tímasetning funda til undirbúnings starfs- og fjárhagsáætlunar og yfirferðar ársfjórðungsuppgjöra, ásamt tímasetningu opinna funda og samráðsfunda með hagsmunaaðilum, eftir því sem við á.

Samhliða gerð fundaáætlunar skal ganga frá dreifingarlista fundargagna og ákveða fyrirkomulag dreifingar þeirra.

Samráð

9. gr.

Nefndin ber ábyrgð á upplýsingamiðlun og samráði við íbúa, frjáls félagasamtök og aðra hagsmunaaðila sem tengjast verkefnum nefndarinnar. Auk lögbundins samráðs skal nefndin leita umsagna eða annars samráðs þegar við á og efni mála gefur tilefni til.

Fjármál

10. gr.

Nefndin fær fjárhagsramma vegna verkefna sem undir hana heyra og felur bæjarritara að vinna starfsáætlun og tillögur að fjárhagsáætlun í samræmi við stefnumótun og forgangsroðun nefndarinnar. Nefndin afgreiðir starfsáætlun og hefur eftirlit með að tillögur í frumvarpi að fjárhagsáætlun séu í samræmi við starfsáætlun og mótaða stefnu. Tillögur um breytingar á rekstrinum sem leiða til breytinga á gjaldskrá eða þjónustu skal sérstaklega skýra og rökstyðja. Formaður nefndar og bæjarritari kynna bæjarráði starfsáætlun og tillögur að fjárhagsáætlun.

Ráðningar

11. gr.

Bæjarráð ræður bæjarritara að fenginni tillögu bæjarstjóra. Bæjarritari ræður í störf undirmanna sinna.

Fullnaðarafgreiðslur

12. gr.

Menningar- og nýsköpunarnefnd afgreiðir án staðfestingar bæjarstjórnar eða bæjarráðs eftirtalin verkefni samkvæmt heimild í 1. mgr. 42. gr. sveitarstjórnarlaga nr. 138/2011, og samþykkt um stjórn Fjarðabyggðar og fundarskóp bæjarstjórnar:

- Ákvarðanir um úthlutun styrkja til menningarmála, þ.m.t. samstarfssamninga með eins árs gildistíma, í samræmi við reglur staðfestar af bæjarstjórn og fjárhagsáætlun hvers árs.

Menningar- og nýsköpunarnefnd getur ávallt vísað afgreiðslu mála samkvæmt 1. mgr. til bæjarráðs og er skylt að vísa þeim til bæjarráðs sé þess óskað af tveimur fulltrúum í nefndinni hið fæsta. Í slíkum tilfellum skal nefndin þó setja fram tillögu að afgreiðslu máls.

Málsmeðferð

13. gr.

Við undirbúning mála og stjórnvaldsákvæðanir skal þess gætt að farið sé að sveitarstjórnarlögum, stjórnarsýslulögum og verklagsreglum um stjórnsýsluna.

Óski aðili rökstuðnings eða beri fram kvörtun vegna afgreiðslu nefndarinnar skal honum leiðbeint um réttarstöðu sína, m.a. um heimild til að óska endurupptöku stjórnvaldsákvörðunar í bæjarráði með hliðsjón af 24. gr. stjórnarsýslulaga. Telji bæjarráð að skilyrði endurupptöku séu fyrir hendi skal nefndin taka mál upp.

Um hæfi kjörinna fulltrúa og starfsmanna vísast í 20. gr. sveitarstjórnarlaga nr. 138/2011 og samþykkt um stjórn Fjarðabyggðar og fundarskóp bæjarstjórnar.

Samþykkt við síðari umræðu í bæjarstjórn Fjarðabyggðar 2. júlí 2018



Gunnar Jónsson
bæjarritari